

- 50 Ergo vis huiusmodi picturacionis,
Tollens ignoranciam est negotionis¹,
Sed illam que dicitur dispositionis,
Tollebat intrinsece vis impressionis,
Que longe maioribus est ditata bonis.
- 51 Tante pulcritudinis vi debilitatus,
Cecidi² in extasim; tandem relevatus
Ei plus quam potui sum approximatus,
Passim quasi nectare quodam debriatus,
Et procumbens genibus, talia sum fatus:
- 52 'O reverendissima domina, tuarum
Benedictus limes sit omnium viarum,
Benedictus talium factor feminarum,
Benedictus ille est, quem tu habes carum.
Audi, dulcis domina, me loquentem parum.
- 53 Si deceret, domina, mee parvitati
Habere colloquium tue maiestati,
Quererem precordiis cordis affectati
Motivum principium tui tam beati
Gressus ad declivia mundi maturati'.
- 54 Illa suum elevans cum severitate
Vultum quasi modicum, similis irate,
Inquit michi protinus: 'O infatuato,
Muliebris, debilis, fere desperate,
Pro tua profecta sum inbecillitate'.
- 55 Tunc ego: 'O domina, que pro me venisti,
Quo vocaris nomine'? Tunc illa: 'Novisti
Hoc bene multociens, sed tu meruisti,
Quod me nunc non nosceres, qui huc accessisti,
Ut feres ut femina, solus corde tristi.
- 56 Ego sum Prudencia, que de celi lare
A celorum solio veni visitare
Sepe mentes hominum et illuminare,
Que in altum elevo meos sine pare,
Eos semper solita decorificare.
- 57 Ego sum Prudencia, que facio gentes
Virtutes appetere, et viciorum sentes
Tollere, cognoscere res preexcellentes;
Que de non scientibus facio scientes;
Et quasi divinitus illumino mentes.
- 58 Ego pro qua usque nunc tot exulavere,
Pro qua se tot divites pauperes fecere,
Pro qua se tot penitus exinanivere,
Pro qua se periculis tot exposuere,
Pro qua tot iniurias graves pertulere.

1) Sic! 2) 'cecedi' Hs.